

30. janúar 1981.

115

Nr. 77.

REGLUGERÐ

um takmörkun leigubifreiða í Mosfellshreppi og ráðstöfun atvinnuleyfa.

I. KAFLI

Almenn ákvæði.

1. gr.

Tala allt að 8 farþega leigubifreiða til mannflutninga í Mosfellshreppi skal á meðan hreppsnefnd Kjalarneshrepps leyfir ekki fólksbifreiðastöð fyrir aðrar bifreiðar en frá bifreiðastöð í Mosfellshreppi, miðuð við íbúatölu í lögsagnarumdæmum Mosfells- og Kjalarneshreppa, þannig að ein bifreið komi á hverja 500 íbúa, sem þar eiga lögheimili, samkvæmt nýjustu skýrslum Hagstofu Íslands. Í fyrstu skal þó úthluta 7 atvinnuleyfum til stofnenda bifreiðastöðvarinnar í Mosfells- og Kjalarneshreppum.

Þar til rétt hlutföll samkvæmt framansögðu er fengin skal úthluta fjórða hverju leyfi, er losnar og einu leyfi, fyrir hverja 1000 íbúa fjölgun.

2. gr.

Enginn bifreiðastjóri má aka allt að 8 farþega leigubifreið til mannflutninga í Mosfellshreppi, nema hann hafi afgreiðslu hjá bifreiðastöð í Mosfellshreppi og hafi öðlast atvinnuleyfi sem leigubifreiðastjóri í Mosfellshreppi.

3. gr.

Leigubifreiðastjórar, sem ekki hafa afgreiðslu hjá bifreiðastöð í Mosfellshreppi hafa ekki atvinnurétt þar, nema eftir kvaðningu fyrirfram.

4. gr.

Í Mosfellshreppi skal bifreiðastöðin ávallt vera opin alla nóttina um helgar.

Bifreiðastjórum er skylt að hlíta þeim reglum sem stjórn bifreiðastöðvarinnar kann að setja í samráði við félag atvinnuleyfishafa, því til tryggingar að ekki sé tilfinnanlegur skortur á leigubifreiðum vissan hluta sólarhringsins.

II. KAFLI

Úthlutun atvinnuleyfa.

5. gr.

Bifreiðastjóri, sem óskar að fá atvinnuleyfi, sem leigubifreiðastjóri, skal sækja um það á þar til gerðum eyðublöðum til Bifreiðastjórafélags Kjósarsýslu fyrir 1. okl. ár hvert.

Umsókninni skal fylgja:

- Vottorð frá bifreiðastöð í Mosfellshreppi um að umsækjandi geti fengið þar afgreiðslu, fái hann úthlutað atvinnuleyfi.
- Hegningarvottorð.
- Vottorð frá manntalsskrifstofunni um að umsækjandi eigi lögheimili á félagssvæði Bifreiðastjórafélags Kjósarsýslu.

Við úthlutun atvinnuleyfa skal starfsaldur bifreiðastjóra við akstur leigubifreiða til mannflutninga jafnan lagður til grundvallar, þannig að sá sem lengstan starfsaldur hefur gengur fyrir, nema sérstakar ástæður mæli því í gegn, enda eigi hann lögheimili og hafi búsetu á félagssvæði Bifreiðastjórafélags Kjósarsýslu.

Úthlutunarmönnum er þó heimilt að víkja frá meginreglum greinar þessarar um starfsaldur og búsetu í sérstökum undantekningartilvikum.

Bifreiðastjórar, sem hafa atvinnuleyfi en hafa lagt það inn hafa forgangsrétt til atvinnuleyfis í næstu tvö ár frá því það var lagt inn, minnst í 6 mánuði.

6. gr.

Atvinnuleyfi skulu gefin út af tveimur mönnum, sem hér eftir eru nefndir úthlutunarmenn í reglugerð þesari. Skal annan þeirra tilnefna af stjórn Bifreiðastjórufélags Kjósarsýslu en hinn skipar ráðherra án tilnefningar. Skulu atvinnuleyfi og tilkynningar um atvinnuleyfi undirrituð af úthlutunarmönnum. Tilnefningin er til þriggja ára í senn.

Stjórn Bifreiðastjórufélags Kjósarsýslu skal senda úthlutunarmönnum rökstuddar tillögur um úthlutun atvinnuleyfa.

Verði ágreiningur á milli úthlutunarmanna sker samgönguráðuneytið úr.

Atvinnuleyfin skulu tölusett og bundin við nafn leyfishafa. Leyfin skulu vera í vörslu Bifreiðastjórufélags Kjósarsýslu, sem síðan tilkynnir útgáfuna, sbr. 2. mgr. 9. gr.

Engum má úthluta fleiri en einu atvinnuleyfi.

Úthlutunarmönnum er skylt að líta eftir að ákvæðum reglna og laga um leigubifreiðar og reglugerðar þessarar sé fylgt og er þeim heimilt að afturkalla atvinnuleyfi um stundarsakir, brjóti leyfishafi af sér, eða fyrir fullt og allt, ef um alvarleg eða ítrekuð brot er að ræða. Slíkum úrskurðum má áfrýja til samgönguráðuneytisins.

7. gr.

Óheimilt er að veita bifreiðastjóra atvinnuleyfi, nema hann skuldbindi sig til að stunda akstur eigin leigubifreiðar og sækji um upptöku í stéttarfélag bifreiðastjóra í Kjósarsýslu.

Þeir bifreiðastjórar, sem vinna störf þau, sem talin eru í b-lið 14. gr. og 16. gr., halda óskertum rétti sínum, þótt þeir stundi ekki akstur eigin bifreiðar.

8. gr.

Hverri bifreiðastöð er skylt að láta úthlutunarmönnum í té, í septembermánuði ár hvert, skrá yfir allar bifreiðar, sem þar hafa afgreiðslu. Í skrá þessari skal tilgreint skrásetningarnúmer bifreiðar, nafn og heimilisfang bifreiðastjóra og bifreiðaeiganda.

III. KAFLI

9. gr.

Leyfishafa er heimilt að hafa bifreið sína í afgreiðslu hjá hverri bifreiðastöð í Mosfellshreppi sem hann getur fengið afgreiðslu hjá, enda sé bifreiðastöðin viðurkennd af hreppsnefnd Mosfellshrepps.

Óheimilt er bifreiðastöðinni að taka bifreið í afgreiðslu fyrr en tilkynning um útgáfu atvinnuleyfis eða flutninga milli stöðva hefur borist frá stéttarfélagi bifreiðastjóra.

Nú vill leyfishafi flytja sig á aðra bifreiðastöð, og skal hann þá afhenda stéttarfélagi bifreiðastjóra yfirlýsingu frá þeirri stöð sem hann hyggst flytja á, um að hann geti fengið þar afgreiðslu. Sé leyfishafi skuldlaus við bifreiðastöð þá, sem leyfishafi flytur frá, skal félag atvinnuleyfishafa staðfesta flutninginn þegar í stað.

10. gr.

Leyfishafa er óheimilt að láta atvinnuleyfi sitt af hendi á nokkurn hátt, nema til félags atvinnuleyfishafa, sem tilkynnir það þegar úthlutunarmönnum.

Leyfishafi getur misst atvinnuréttindi sín, ef hann er fjarverandi tvo mánuði eða lengur, án þess að hafa tilkynnt viðkomandi bifreiðastöð fjarveru sína og orsakir hennar. Stöðvarstjóri skal þá tilkynna fjarveruna stjórn félags atvinnuleyfishafa, en hún ber málið undir úthlutunarmenn, sem ákveða hvort svipta skuli leyfishafa atvinnuleyfi eða ekki.

Hafi leyfishafi ekki átt bifreið í 1 ár eða lengur hefur hann fyrirgert rétti sínum til atvinnuleyfisins.

11. gr.

Brjótí leyfishafi eitthvað það af sér, að dómi bifreiðastöðvarstjóra, að segja beri leyfishafa upp afgreiðslu um stundarsakir, er viðkomandi bifreiðastöðvarstjóra heimilt að segja leyfishafa upp afgreiðslu í allt að 5 sólarhringa í fyrsta skipti, en allt að 10 sólarhringa í annað skipti.

Skulu slíkar uppsagnir og tilefni þeirra skrásettar hjá viðkomandi bifreiðastöð og tilkynntar úthlutunarmönnum jafnóðum.

Telji bifreiðastöðvarstjóri ástæðu til að víkja leyfishafa úr afgreiðslu oftari, lengri tíma eða fyrir fullt og allt, skal viðkomandi bifreiðastöð leggja málið fyrir úthlutunarmenn. Skulu úthlutunarmenn, innan 15 daga, úrskurða, hvort útiloka skuli umræddan bifreiðastjóra frá afgreiðslu og hve langan tíma eða alveg.

Telji úthlutunarmenn ástæðu til að segja leyfishafa upp afgreiðslu um lengri eða skemri tíma, skal atvinnuleyfi leyfishafa vera í vörslu þeirra, meðan uppsögn afgreiðslunnar stendur.

Viðkomandi bifreiðastöð er skylt að taka leyfishafa í afgreiðslu aftur að afgreiðslubanni loknu, ef leyfishafi æskir þess.

Nú æskir leyfishafi ekki að afgreiðslubanni loknu að fara til þeirrar bifreiðastöðvar, sem hann var hjá, skal hann þá innan 30 daga útvega sér afgreiðslu hjá annarri bifreiðastöð, en takist honum það ekki, hefur hann fyrirgert rétti sínum til leyfisins og fellur það þá til úthlutunar að nýju, nema úthlutunarmenn ákveði annað.

Báðir aðilar hafa rétt til að skjóta úrskurði úthlutunarmanna til samgönguráðuneytisins, innan 6 daga frá birtingu úrskurðarins, ef um er að ræða útilokun í 6 mánuði eða lengri tíma, eða ef ágreiningur er um afgreiðslu málsins hjá úthlutunarmönnum.

12. gr.

Nú hættir leyfishafi að reka leigubifreið samkvæmt atvinnuleyfi sínu og segir atvinnuleyfinu upp. Skal hann þá skrá yfirlýsingu þar að lútandi á atvinnuleyfi sitt, og síðan ráðstafa úthlutunarmenn leyfinu samkvæmt reglugerð þessari.

Tilkynna skal þetta til bifreiðastöðvar þeirrar, sem hann hafði afgreiðslu á.

13. gr.

Heimilt er að hafa vaktaskipti bifreiðastjóra á leigubifreiðum, þó báðir hafi ekki atvinnuleyfi. Þegar svo er gert getur samgönguráðuneytið ákveðið í samráði við stjórn félags atvinnuleyfishafa í Mosfellshreppi, verði tilfinnanlegur skortur leigubifreiða, að út verði gefnar tímabundnar undanþágur eftir reglum sem samgönguráðuneytið setur.

Einnig er stjórn stéttarfélags leigubifreiðastjóra skylt að veita undanþágu í eftirgreindum tilvikum:

- a. Þurfi leyfishafi á endurhæfingu að halda að undangengnum veikindum, enda leggi hann fram yfirlýsingu frá lækni þeim sem hann hefur verið í meðferð hjá um að endurhæfing sé honum nauðsynleg í takmarkaðan tíma.
- b. Heimila má launþega að aka í atvinnuleyfi vinnuveitanda síns öðrum bíl en vinnuveitanda, sé um að ræða stöðvun vegna bilunar í minnst 7 daga eða lengur. Skal stjórn félags atvinnuleyfishafa athuga réttmæti umsókna samkvæmt grein þessari hverju sinni.

14. gr.

Leyfishafa er óheimilt að láta annan en þann, sem hefur atvinnuleyfi, aka fyrir sig, nema í eftirgreindum tilfellum, að fenginni undanþágu samkvæmt 15. gr.:

- a. Ef leyfishafi er veikur, enda sanni hann veikindi sín með vottorði frá lækni.
- b. Ef leyfishafi er að vinna í þágu félags atvinnuleyfishafa, bifreiðastöðvar þeirrar, er reglugerð þessi nær til, eða þeirra stofnana verkalýðssamtakanna sem viðkomandi félag atvinnuleyfishafa á aðild að.
- c. Ef leyfishafi deyr, heldur maki hans atvinnuleyfinu í allt að 3 ár frá dauða hans, ef maki æskir þess, enda sé hann félagi í félagi atvinnuleyfishafa. Heimilt er að framlengja tíma þennan, ef sérstakar ástæður mæla með því, en þó ekki lengur en 1 ár hverju sinni.
- d. Félag atvinnuleyfishafa skal, ef sérstaklega stendur á, og ef verulegar ástæður mæla með því, heimila leyfishöfum að láta aka fyrir sig um ákveðinn tíma, enda séu úthlutunarmenn því meðmæltir.
- e. Félag atvinnuleyfishafa skal heimila leyfishöfum að láta aka fyrir sig á orlofstíma, þó eigi lengur en allt að 4 vikum árlega, enda lýsi leyfishafi því yfir, að hann sé að fara í orlof.

15. gr.

Vilji leyfishafi öðlast undanþágu samkvæmt 13. eða 14. gr., skal hann sækja um það skriflega til félags atvinnuleyfishafa. Umsókninni skal fylgja vottorð frá bifreiðastöð leyfishafa um, að hún samþykki þann ökumann, sem leyfishafi vill, að aki bifreiðinni.

Bifreiðastjórafélaginu er þá skylt að veita undanþáguna, og skal hún vera skrifleg, tímabundin og tekið fram, hvað í henni felst. Er viðkomandi bifreiðastjóra skylt að bera slíka undanþágu á sér, er hann er við akstur, og sýna trúnaðarmönnum félagsins, ef þeir æskja þess.

Bifreiðastjórufélagið skal halda skrá í aðgengilegu formi yfir veittar undanþágur samkvæmt reglugerð þessari og hafa úthlutunarmenn og samgönguráðuneytið aðgang að henni, hvenær sem óskað er.

16. gr.

Óski forseti Íslands eða ráðherrar að ráða leyfishafa sem einkabílstjóra á meðan þeir gegna embætti, skal stjórn félags atvinnuleyfishafa veita undanþágu frá 1. mgr. 7. gr.

Reglugerð þessi, sem sett er samkvæmt lögum um leigubifreiðar nr. 36 9. maí 1970, staðfestist hér með til þess að öðlast þegar gildi og birtist til eftirbreytni öllum þeim sem hlut eiga að máli.

Samgönguráðuneytið, 30. janúar 1981.

Steingrímur Hermannsson.

Kristinn Gunnarsson.